

- 1^r Wer vff syn eygnen synn vßflügt
- 2^r Der selb zûn vogelnâster stygt
- 3^r Das er offft / vff der erden lygt



Von Eygenrichtikeyt.

- 1 Der kratzet sich mit den dornen scharpff
- 2 Wån duncket das er nyemans bdarff
- 3 Vnd meynt er sy alleyn so klûg
- 4 Vnd allen dingen witzig gnûg

2 bdarff GW5046 GW5047] darff GW5041

5 Der jrrt gar dick vff ebner stroß
 6 Vnd fůrt sich jnn eyn wilttniß groß
 7 Das er nit licht kumbt wyder heyn /
 8 We dem der velt / vnd ist alleyn
 9 Zũ kátzer synt vil worden offt
 10 Die woltten nit / das man sie strofft
 11 Verlossend sich vff eygne kunst
 12 Das sie eruolgtent rúm vnd gunst
 13 Vil narren fyelen ettwann hoch
 14 Die stygen vogelnáster noch
 15 Vnd sũchten wág / do keyner waß
 16 On leyttter mancher nyder saß
 17 Verachtung dick den boden růrt
 18 Vermessenheyt vil schiff verfürť
 19 Nyemer erfolget nutz noch ere
 20 Wer nit mag han / das man jn lere
 21 Die welt wolt Noe hõren nye
 22 Biß vndergingen lüt vnd vieh /
 23 Chore wolt dũn das jm nit zam
 24 Dar vmb er mit sym volck vmb kam
 25 Das sunder thier das frißt gar vil
 26 Wer eygens koppfs sich bruchen will
 27 Der selb zertrennen vnderstat
 28 Den rock gar offt / der do ist on nat
 29 Wer hofft dem narren schiff entgan
 30 Der muß des wachs jnn oren han
 31 Das brucht Vlisses vff dem mer
 32 Do er sach der Syrenen her
 33 Vnd er durch wißheyt von jnn kam
 34 Do mit eyn end jr hochfart nam